

## Karnival Barang Malaysia pada 13 hingga 17 Disember

Bernama

Disember 5, 2023 06:15 MYT

KUALA LUMPUR: Kementerian Perdagangan Dalam Negeri dan Kos Sara Hidup (KPDN) akan menganjurkan Karnival Barang Malaysia 2023 pada 13 hingga 17 Dis ini di Pusat Pameran dan Konvensyen IOI City Mall, Putrajaya.

KPDN dalam kenyataan pada Isnin memaklumkan acara tahunan itu yang membabitkan 100 pempamer pelbagai produk tradisional dan inovasi moden, akan menjadi platform penting buat peniaga untuk mengetengahkan produk serta mengembangkan jalinan dan berkolaborasi dengan rakan strategik yang berpotensi.

"Pengunjung berpeluang meneroka dan melihat kepelbagaian produk Malaysia dan ini adalah peluang yang baik bagi pengguna untuk menemukan produk baharu di samping menyokong perniagaan produk tempatan serta berbangga dengan warisan negara.

"Antara objektif utama yang ingin disampaikan adalah produk tempatan bukan sahaja mempunyai kualiti bertaraf dunia tetapi juga mempunyai potensi besar untuk dipasarkan ke luar negara," menurut kenyataan itu.

Untuk maklumat terkini mengenai aktiviti Karnival Barang Malaysia 2023, orang ramai boleh melayari Facebook Kempen Beli Barang Malaysia, Instagram @kempenbelibaranganmalaysia, X @KBBMKPDN, TikTok @kbbm\_my dan YouTube @kempenbelibaranganmalaysia2023.